

四庫全書

集部

欽定四庫全書

御訂全金詩增補中州集卷二十七

史內翰公奕

一首

公奕字季宏大名人系出石晉鄭王弘肇父良  
臣宣和中擢第終於潞州觀察副使季宏大定  
二十八年進士再中博學宏詞科程文極典雅  
遂無繼之者累遷著作郎翰林修撰同知集賢  
院正大中置益政院楊吏部之美與季宏皆其

選也以直學士致仕年七十三卒季宏文章書  
翰皆有前輩風調下至碁槩之技亦絕人遠甚  
閒閒稱其溫厚謙退與人交愈久而愈不厭其  
學問愈扣而愈無窮其見重如此詩文號洹水  
集兵後失之子應祖字企先孫彥忠今在燕中  
補歸潛志史翰林公奕字季宏大名人工書有  
能名自號歲寒堂主人正大初為翰林修撰又  
充益政院官後致仕居亳卒重厚人也

李鴈門

天下三分二屬梁區區獨木欲支唐錦囊三矢傳遺恨  
不救朱三著赭黃

附明宋濂題史內翰書右歸去來辭一卷大名  
史公奕興定五年所書以贈李泚者也公奕字  
季宏大定二十八年進士再中博學宏詞科累  
遷著作郎翰林修撰同知集賢院後以直學士  
致仕文章書翰皆有故老遺風所著洹水集尚

傳於世澥字公渡湘人也少學詩於王內翰子  
端亦工行書不失前輩典刑累舉不第而卒自  
黨文獻世傑趙郎中文孺任判官君謨趙尚書  
周臣諸公先後疊起風聲氣習濡染為深故金  
之士大夫多以善書名家觀季宏公渡則其餘  
盡可見矣季宏性雖溫厚每靳與人書今特為  
公渡贈者豈非同聲相應者乎宣宗自改元興  
定之後國政愈非而疆土日蹙古人之文何限

季宏不之書而獨拳拳於是書者意其先見亡  
北而殆將隱歟距作此紙時僅十年而金社遂  
屋矣吾黨閱此卷者又當於此求之

蕭尚書貢

三十二首

貢字真卿咸陽人唐太傅實十七代孫博學能  
文不減前輩蔡正甫大定二十二年進士自涇  
州觀察判官召補省掾不四五月拜監察御史  
累遷右司郎中預修泰和律令所上條畫皆委

曲當上心興陵嘉歎曰漢有蕭相國吾有蕭貢  
刑獄吾不憂矣又奏死囚獄雖已具仍責家人  
伏辨以申冤抑詔從之遷刑部侍郎入謝曰臣  
願因是官廣陛下好生之德上大悅凡真卿所  
平反多從之歷大興同知德州防禦使同知大  
名府事陝西西路轉運使河東北路按察轉運  
使靜難軍節度使南京都轉運使御史中丞以  
戶部尚書致仕年六十六終於家謚曰文簡有

注史記百卷公論三十卷五聲姓譜五卷文集  
十卷傳於世

渭南縣齋秋雨

穴牀撐柱小牕前一點青燈照不眠  
簷溜琮琤風淅瀝嫩涼如水夜如年

假梅

綠牕嬌小似梅人素手東風巧思新  
鸞尾剪裁千顆雪蜂脾點綴一家春  
長教客枕生幽思不逐林花委路塵



莫道去非詩破的  
毫那解寫花真

臨泉道中

半世事行役  
茲游初未經  
峽門迷白晝  
嶺脊上青冥  
澗曲莓苔滑  
松盤霧雨冥  
登危人跼蹐  
涉險馬鈴鐺  
落日留行客  
投鞭得驛亭  
短牆明積雪  
破屋漏疎星  
羌笛誰三弄  
羈懷強一聽  
葭蘆知不遠  
河外數峯青

自感

形骸付與甄陶外  
禍福難防倚伏前  
孔雀若知牛有角

應須忍渴過寒泉

荒田擬白樂天

荒田幾歲闕人耕  
欲種糜蕎趁晚晴  
急于剪除荆與棘  
一科才了十科生

樂府崔生

徽蘭二  
崔名

徽門晝暖柳啼鶯  
蘭閣春深月照紗  
腰素輕盈珠袂穩  
鬢雲鬆亂玉釵斜  
春風一去空陳迹  
暮雨三生只當家  
自倚廣平心似石  
不妨綺語賦梅花

米元章大字卷

楊顏死去誰補處米狂筆力未可涯追摹古人得高趣  
別出新意成一家老蛟驤雲肉倔強枯樹漬雪冰楂牙

九原裴說如可作應有新詩三嘆嗟

裴說懷素草書歌  
欲歸家嘆嗟嗟眼

前三箇字枯樹楂  
烏梢蛇黑老鴉

楊侯畫晉公臨江賞梅樂天與鳥窠禪師汎舟談

玄不顧而去戲為一絕以代晉公招樂天同飲云

明粧冷蕊兩清新面纈浮光數爵頻拭風前寒鼻液

快來同醉雪中春

漢歌

華陰雙壁傳山鬼  
報道明年祖龍死  
草間豪傑伺天時  
攘袖撫衿爭欲起  
藁祠篝火妖狐語  
夥涉為王張大楚  
南公舊有三戶謠  
東井新看五星聚  
中原茫茫走秦鹿  
天遣沛公興白屋  
大蛇斬斷素靈號  
蚩尤祭罷朱旗矗  
竭來扶義入關中  
恩結人心帝道隆  
秦法煩苛猶一洗  
項王慄悍何勞攻  
三傑相須立人紀  
四老仍來安太子

已令陸賈說詩書更詔孫通制儀禮阿翁着手規摹遠  
獨恨兒孫讀城旦王純霸雜寧不知不是不知知已晚

楚歌

沙丘車過亡明鏡人頭畜鳴自賢聖阿房殿裏醉宮娃  
趙高手持國柄羣雄雲擾蕩山東邯鄲却隨秦圍中  
項王一戰動天地諸侯膝行趨下風割裂河山建侯國  
天下畏威心不服只貪衣繡榮楚猴豈識金刀得秦鹿  
楚歌一夜四面發泣別虞姬歌數闕殘兵牢落似晨星

獨騎凌兢踏寒月烏江渡口方喚船五侯追奔已江邊  
苦道天亡非戰罪劍化壯氣成飛煙君王雄武古無比  
獨無仁義誰相濟向能忠計資范增未必漢家能卜世  
穀城東頭土一丘悠悠遺恨何年休

悲長平

秦兵伏甲武安西趙將非材戰士攜千里陣雲沈曉日  
萬家屋瓦震秋聲哀纏朽骨天應泣怨入空山鳥不棲  
百戰區區竟何得阿房烟草亦淒迷

雒陽

西來洛水遶崧高野店荒村換市朝  
董卓搜牢連數月郭威分市又三朝  
劫灰深掘終難盡鬼火爭然忽自消  
千古興亡幾春夢只將閒話付漁樵

中秋對月

去年中秋客神京露坐舉杯邀月明  
今年還對去年月北風黃草遶西城  
年年月色長清好只有悲秋人易老  
兒童不解憶長安歌舞團團遶翁媪  
人生宦游真可憐

不知何處度明年  
預愁老罷廢詩酒  
負此冰玉秋嬋娟  
我生萬事隨緣耳  
居自無憂行亦喜  
君不見杜子閨中  
只獨看鄜州寂寞  
千山裏

寄答張維中

北轅千里赴陪都  
日覺還家計愈疎  
人事浮雲千變化  
宦途平地幾崎嶇  
青山有約長回首  
白髮無情忽滿梳  
賴有同年老兄弟  
相思時寄數行書

保德州天橋



鬱鬱風雲入壯懷天潢飛下碧崔嵬兩崖偪側無十忱  
步萬頃逡巡納一盃濺沫紛紛跳亂電怒濤殷殷轉晴  
雷曾聞雷火魚燒尾會趁桃花漲水來

靈石縣

古道行人少荒城亂石侵天橫機素直河入土囊深澗  
近雲長潤山高日易沈田翁樂豐歲歌笑下崎嶇

真容院

魔宮佛界等空虛此理何曾屬有無直向臺山始相見

定中還有二文殊

讀火山瑩禪師詩卷

禪師隰州白氏岐山令君舉  
樞判文舉之弟自幼日有詩

名河東嘗有詩云十日柴門九不開松庭雨後  
滿蒼苔草屨挂起跏趺坐消得文殊更一來歸

寂後客有示其  
集者因題其上

長短都歸一夢中  
身前身後兩無窮  
三生信士今如在  
定向江湖訪澤公

君馬白

我馬瘦君馬肥  
我馬虺隤君馬飛  
彫鞍寶鉸錦障泥  
向我

風振迅長鳴嘶一朝計落路傍兒銅鬲為榔薪為衣瘦  
馬雖瘦骨骼奇古人相馬遺毛皮千金一顧會有期

陳宮詞

三閣花深白晝迷酒催狎客賦宮詞管絃散落春風外  
一曲金釵兩鬢垂

寄嵐

寄嵐地勢橫三汊河朔城墉挂一箕紫塞高連寒日短  
黃榆落盡長年悲

按部道中二首

虛野河津水沒腰管岑官路雪封條一年樂事能多少  
強半光陰馬上消

寒城睥睨插山隅秋半霜風塞草枯月轉譙樓天未曉  
角聲吹徹小單于

日觀峯

半夜東風攪鄧林三山銀闕杳沈沈洪波萬里兼天湧  
一點金烏出海心

族兄才卿一第後赴宜祿酒官以詩寄之

久期老距擅文場  
命壓人頭可得忙  
兩腳塵泥官業晚  
十年燈火夜牕涼  
霜添老葉山梨紫  
雨浥寒花野菊香

寒花一作寒叢

南北相望無百里  
幾時尊酒浣離腸

梨花

丰姿閒淡洗粧慵  
眉綠輕顰秀韻重  
香惹夢魂雲漠漠  
光搖溪館月溶溶  
陳家樂府歌瓊樹  
妃子春愁慘玉容  
安得能詩韓吏部  
郭西同去醉千鍾

後趙

擬倫人物指高光可笑臬雖不自量正使成名皆豎子  
英雄也不到君行

古採蓮曲

洋洋長江水渺渺漲平湖田田青荇荷艷艷紅芙蕖  
酣斜日外冉冉涼風餘蓓蓓誰家子裊裊二八初兩兩  
並輕舟笑笑相招呼悠悠波上駕潏潏蒲中魚采采不  
盈手依依欲何如

擬迴文四首

春波綠處歸鴻過  
夜月明時飛鵲愁  
人去附書將恨寄  
暮山雲斷倚高樓

樓上却來樓下待  
晚窗春盡斷回腸  
愁人有說嫌人問  
淚灑新詩埽墨香

風幌半縈香篆細  
碧牕斜影月籠紗  
紅燈夜對愁寬夢  
老盡春庭滿樹花

萋萋碧草連天遠  
杳杳行人幾日迴  
淒雨晚涼空坐久

淚粧殘暈濕紅腮

龐都運鑄二十首

鑄字才卿大興人家世貴顯明昌五年進士風  
流文采為時輩所推字畫亦有蘊藉仕至京兆  
運使自號默翁

補歸潛志龐戶部鑄字才卿遼東人少擢第仕  
有能名南渡為翰林待制遷戶部侍郎坐游貴  
戚家出倖東平擢京兆路轉運使卒博學能文



工詩書藹然為一時名士

雪谷曉裝圖

溪流咽咽山昏昏前山後山同一雲天公談笑玉雪噴  
散為花蕊白紛紛詩翁瘦馬之何許忍凍吟詩太清古  
老奴寒縮私自語作奴莫比詩奴苦木僵石老鳥不飛  
山路益深詩益竒老奴忍笑憐翁癡不知嗜好乃爾為  
楊侯胸中富丘壑醉裏筆端驅雪落因何不把此詩翁  
畫向草堂深處著

驛中夜雨

畫角邊城暮孤春野水秋一川霜樹老萬葉雨聲愁  
自古誰青眼勞生只白頭何時問漁父容我一扁舟

洛陽懷古

草樹蕭條古苑荒山川慘淡客寬傷玉光照夜新開塚  
劍氣沈沙古戰場金谷更誰誇富麗銅駝無處問興亡  
一尊且對春風飲萬事從來穀與臧

田器之燕子圖 器之自叙云明昌丙辰予從軍

塞外唎婁山野舍荒涼難以狀言春末有雙燕  
亦巢此屋土人不之識屢欲捕之予曲為全護此  
燕晝出夜歸予必開戶待之忽一日飛止坐隅都  
無驚畏巧語移時不去予始悟明日秋社此鳥當  
歸殆留別語也因作一詩贈之云幾年塞外歷崎  
危誰謂烏衣亦此飛朝向蘆陂知有為暮投茅舍  
重相依君憐我處頻迎語我憶君時不掩扉明日  
西風悲鼓角君應先去我何歸此詩以細字寓之

為蠟丸繫之燕足上明年四月予受代歸又八年  
泰和甲子任潞州觀察判官四月十二日偶坐廨  
舍之含翠堂忽雙燕至一飛簷戶間一上硯屏予  
諦視之繫足蠟丸故在乃知此鳥蓋往年贈詩者

也因請同年龐君才卿畫為圖求諸公賦詩

器之姓田

名琢雲朔人明昌五年進士仕至山東路宣撫使  
慷慨有志節間聞公所謂田侯落落奇男子者也

田君才畧燕雲客少年累有安邊策悔從筆硯取功名  
直要橫馳沙漠北塞垣春雪白皚皚東風未放玄陰開

烏衣之國定何許一雙燕子能飛來三年驛舍安西道  
眼底鶯花無夢到忽見低飛入短簷此身似向邯鄲覺  
君居海東我中原相逢乃在穹廬前天涯流落俱為客  
感時念遠空潜然長安何限高高閣晝夜風閒開翠幕  
底事猜嫌不往依甘從此地風沙惡土人嗜肉無仁心  
一生弋獵誇從禽有巢幸穩勿浪出汝身未必輕千金  
朝來暮去益狎昵物我相忘情意一但怪重裘積漸添  
元是西風催社日須知音巧惟鷓鴣忽來坐隅如告辭

我方留寓未歸得為君忍賦傷心詩詩成自述聊為戲  
繫足封之亦無意燕已歸飛我未歸刁斗聲中忽驚歲  
旄頭夜落妖氣收嫖姚獻凱歸神州玉關早喜班超入  
北海不聞蘇武留君才經世寧終枉幕府須賢來上黨  
別後歸期兩及瓜人間秋燕十來往沈沈官舍紅芳稀  
葛衣燕居澹忘機忽聞巧語入簷戶大似相識來相依  
一飛簷外窺庭樹一上屏山驚不去解足分明得帛書  
真是當年留別句天生萬物禽最微固耶偶耶吾不知

古道益遠交益醜朝思暮怨雲遷移當時握手悲別離  
一旦富貴棄如遺聞予燕歌應自疑慎無示之嗔我譏

楊之美尚書詩云危巢客舍久相依常記西風社日歸  
海國傳心千驛隔塞垣回首十年非新詩尚在人空老  
舊夢無憑鳥自飛寄語齊諧休誌怪沙鷗相款解忘機  
張巨濟云沙塞相逢命已輕翠堂重見眼增明小詩繫  
足初無意巧語迎人獨有情陰德自招黃雀報機心能  
致白鷗盟社前秋後風光好須賀他年大履成李之純  
云一別天涯十見春重來白髮一番新心知話盡春愁  
處相對依依如故人王大用云相別相尋積歲年人心  
不及鳥心堅莫償恩義三生債分付平安七字篇王謝  
烏兜疑誕說紹蘭紅線定虛傳何如此段人親見舊話  
從今不直錢李欽叔云塞上風光已十霜仁心覆護獨  
難忘當時相送詩仍在此日重來話更長客舍花開新

信息雲兜杳冷舊昏黃主人得報君知否千古珠璣在  
錦囊閒閒趙公三詩田思敬敬之乃白晉卿趙永元王  
副樞子明詳節張雲卿  
師緒各一詩此不具錄

### 晚秋登城樓二首

山勢碧環合溪光縞帶明  
牛年成晚景砧杵助秋聲  
酒薄人情廢官閒吏事生  
天東歸興滿不為憶尊羹  
落日危樓上詩成只自哦  
清商行老矣紅葉奈秋何  
墮甌前非悟跳丸去日多  
功名猶誑我未許著漁蓑

### 冬夜直宿省中



吏散庭空宿鳥過凍吟聊復戰詩魔  
陶泓面冷真堪唾  
毛穎頭尖漫費呵畏事政宜賓客少  
不才偏覺簿書多  
西牕燈暗尊無酒奈此迢迢夜漏何

山行絕句

四面雲山玉作圍一川霜樹錦為衣  
翩翩數騎南岡下  
傳粉王孫射鹿歸

漉酒圖

我愛陶淵明愛酒不愛官彈琴但寓意  
把酒聊開顏自

得酒中趣豈問頭上冠誰作漉酒圖清風起毫端露電  
出形似神情想高閒大似揮絃時目送飛鴻難袖中有東  
籬開卷見南山嗟予困塵土青鬢時一斑折腰尚未免  
敢謂善閉關望望孤雲翔羨羨飛鳥還歸田未有日掩  
卷空長嘆

夏日

富國才疎合自羞清時無補但優游只知錢向紙中裏  
不信能教地下流

花下

香滿西園曉雨微  
萬紅千翠自高低  
若為常作莊周夢  
飛向幽芳鬧處棲

梨花

孤潔本無匹  
誰令先衆芳  
花能紅處白  
月共冷時香  
縞袂清無染  
冰姿淡不粧  
夜來清露底  
萬顆玉毫光

未開牡丹

國香半吐醉顏酡  
炫耀春光已自多  
愛惜不教催羯鼓

更澆卯酒看如何

却暑

九夏樓居不厭高更須直至冷雲巢  
風來蘋末聊自快暑滿人間無處逃  
蔗蜜漿寒冰皎皎畫簾鈎冷月稍稍  
閒思殿角生涼句誰為誠懸作解嘲

懷友

鏡裏衰顏失舊紅當年豪逸夢魂中  
山城對月中秋夜隴鴈寄書西北風  
遣興與誰同酒盞相思無處附詩筒

憑高想到消寬處落日無言鳥自東

喜夏

小暑不足畏深居如退藏青奴初薦枕黃妳亦升堂  
鳥語竹陰密雨聲荷葉香晚涼無一事步屨到西廂

墨竹三首

隔溪烟雨

一溪流水玉涓涓溪上修篁接暮烟誰倩能詩文與可  
筆端移得小江天

秋風驟雨

瀾川急雨暗秋空無限琅玕澹墨中  
劍甲縱縱軍十萬欲將貔虎戰斜風

春雷起蟄


千梢萬葉玉玲瓏枯槁叢邊綠轉濃  
待得春來驚蟄起此中應有葛陂龍

山谷透絹帖

君不見李廣射虎如射兔霹靂一聲石飲羽又不見巨

靈壁山如擘雲蓮華萬仞留掌痕精神入物物乃爾筆  
端有神亦如此熙豐以來推善書日下無雙黃太史胸  
中八法蟠虹霓峨眉仙人容並馳平生敗筆塚累累妙  
處不減磨崖碑呂侯好古兼好異與字分身作游戲清  
潭錯落印星壁大澤縱橫散龍蛻又如漢宮粉黛爭嬋  
娟倚風顧影影更研豈無硬黃官紙與臨做畫師寫照  
非天然呂侯之子今詩仙傳家以此為青氈須防神物  
有時合却逐六丁飛上天

附畫史會要龐鑄善山水禽魚





御訂全金詩增補中州集卷二十七

欽定四庫全書

集部

御訂全金詩增補中州集卷二十八

詳校官中書

臣張虎拜

主事銜

臣徐以坤覆勘

總校官編修

臣王燕緒

校對官編修

臣厲守謙

謄錄監生

臣黃嘉績

欽定四庫全書

御訂全金詩增補中州集卷二十八

許司諫古

四首

古字道真永安中進士在宣宗朝以直言極諫  
稱哀宗即位首命驛致之洛致仕授右司諫未

幾乞身還伊陽

閒閒公制詞云安車蒲輪天子所以厚優賢之禮黃冠野服人

臣所以遂歸老之心其恩榮足以兩全而前後不可多得有臣如此如卿幾人具官道直以方氣剛而大議論非世儒所到名節以古人自期擢自先朝置之諫列斥安昌竊位已聞折檻之

忠及梁冀伏辜方見埋輪之志朕即大位稔聞  
直聲起之於田里退聞之間起之於侍從論思  
之地完備始終之節從容進退之間數陽城之  
敢言惜其將去念孔戔之既老挽之莫留特進  
一階榮躋四秩華山拂袖最足為世上之間神  
武挂冠猶不負山中之相勉終晚節益介奇襟

郡守為起伊川亭道真性嗜酒老而未衰每乘  
舟出村落間留飲或十數日不歸及泝流而上  
老稚奔走爭為之挽舟數十里不絕其為時人  
愛慕如此正大七年年七十四卒前三日有書  
見及字已敬傾矣

補歸潛志許司諫古字道真河閒人父安仁子  
靜名士汾陽軍節度使公少擢第南渡為侍御  
史時丞相高琪擅權變亂祖宗法度公上章劾  
之上知其忠常庇翼之凡有奏下尚書省輒去  
其姓名然竟為高琪所中貶鳳翔幕正大初召  
為補闕遷左司諫言事稍不及昔時後致仕居  
嵩山下病卒平生好為詩及書然不為士大夫  
所重公論但稱其直云初貶鳳翔朝士畏高琪

故皆不敢與言余先子時為提舉南京權貸事  
獨以詩送之有云有晉必無楚兩雄難並驅向  
來既發藥其可止半途又曰君年迫桑榆隻身  
憂患餘雙親白楊拱同氣紫荆枯貧無孟光春  
醉無驥子扶唯有忠義名可與天壤俱益欲堅其初  
志也聞者竦然多傳之後為鳳翔錄事先人又寄以  
詩云寄語多言唐諫議生還記取李師中亦此意也

青柯坪二道人

深谷緣危磴長林繞碧山  
山中四時好方外兩翁閒  
身世青雲上塵埃大夢間  
高情應笑我才到却空還

被召過少室

老病無堪合退休伊川久已得菟裘  
如今又上長安道好被青山笑白頭

扇圖

雲壓溪塘小雪春融融和氣氤輕塵  
山禽共作梅花夢物性由來嬾是真

訪箕和尚峴山

箕出衣冠家在三屯山中有元夕懷京都詩云一燈  
明處萬燈明天上人間不夜城前日惠休洪覺範雪  
窗孤坐聽猿聲甚為時人所稱

山中風定夜沈沈月滿禪林靜客心蒼檜四排嚴法界  
孤松中立殷潮音鼓鐘有節人如玉臺殿無塵地布金  
二月來遊春尚淺紅梅無數照山陰

附許古諫南伐疏昔大定初宋人犯宿州已而



屢敗世宗料其不敢遽乞和乃勅元帥府遣人  
議之自是太平幾三十年泰和中韓侂胄妄開  
邊釁章宗遣駙馬布薩揆討之揆慮兵興費重  
不能久支陰遣侂胄族人齎乃祖琦畫像及家  
牒偽為歸附以見丘密因之繼好振旅而還夫  
以世宗章宗之隆府庫充實天下富庶猶先俯  
屈以即成功告之祖廟書之史冊為萬世美談  
今其可不務乎今大兵少息若復南邊無事則

太平不遠矣或謂需用威武可使宋人屈服此  
殆虛言不究實用藉令時勢小捷亦不足多賀  
彼見吾勢大必堅守不出我軍倉卒無得須還  
以就糧彼復乘而襲之使我欲戰不得欲退不  
能則休兵之期乃未見也願陛下畧近功慮後  
患不勝幸甚

附歸潛志貞祐閒珠格高琪為相欲樹黨固其  
權先擢用文人將以為羽翼已而臺諫官許古

劉元規之徒見其恣橫相繼言之高琪大怒斥  
罷二人因此大惡進士更用胥吏彼喜其獎拔  
往往為盡心於是吏權大盛勝進士矣又高琪  
定制省部寺監官共注進士吏員又使由郡轉  
部由部轉臺省不三五年皆得要職士大夫反  
畏避其鋒而宣宗亦喜此曹刻深故時全由小  
吏侍東宮至為僉樞密院事南渡後吏權大盛  
其遷與進士等甚者反疾焉故一時之人爭以

此進故士大夫家有子弟讀書往往不終輒輟  
令改試臺部令史其子弟輩既習此業便與進  
士為讐其趨進舉止全學吏曹至有舞文納賄  
甚於吏輩者惟僥倖一時進用不顧平日源流  
此可為長太息者也

附歸潛志省吏前朝止用胥吏號堂後官金朝

大定初張太師浩

闕

宰執子試補

外雜用進士凡登第歷三任至縣令以次召補

充一考三十月輒得六品州倅兩考六十月得  
五品節度副使留守判官或就遷為知除知案  
由之以漸得都事左右司員外郎郎中故仕進  
者以此途為捷徑如不為省令史即循資級得  
五品甚遲故有節察令推何日了鹽度戶勾幾  
時休之語浩初定制時語人曰省庭天下儀表  
如用胥吏定行貨賂混淆用進士清源也其進  
士受賕如良家子女犯姦也胥吏廉如娼女守

節也議者皆以為當屏山嘗為余言之然省令  
史儀體冠帶抱書進趨與掾吏不殊有過輒決  
杖惜乎以胥吏待天下士也故士大夫有氣槩  
者往往不就如雷翰林希顏魏翰林邦彥宋翰  
林飛卿及余先子或召補不願或暫為遽告出  
皆不能終其任也李文欽止為余言宋制省曹  
有檢正皆士大夫其堂吏主行移文字也且問  
余以宋制與金制孰優余以為宋制善欽止曰

此議與我合也

附歸潛志金朝用人大概由省令史選左右司郎中員外郎首領官取其簿書精幹也由左右首領官選宰相執政取其奏對詳敏也其經濟大畧安在哉此所以在位者多長於吏事也

王防禦良臣 一十首 補一首

良臣字大用潞人承安五年進士作詩以敏捷稱又於內典有所得入翰林與李欽叔善從軍

南征欽叔與行道中酬唱甚多有詩云蕎花冉冉蜜脾香禾穗累累鵲眼黃一縷晚烟吹不去為誰著意護秋霜欽叔愛之興定初自請北行沒於軍中贈孟州防禦使

補歸潛志王翰林良臣字大用潞州人長於律詩尖新工對屬南渡在館後從李天英北征遇害其上伊喇總管云筆底有神扶氣力人間無處著聲名人多傳之



送任李二生赴舉

塵澀鰲鉤公子恨風吹馬耳謫仙愁  
皇天老眼成人晚今日男兒得志秋  
官樣文章堆筆底世情風色候江頭  
主司不是冬烘物五色迷人莫浪憂

汴堤懷古

迷仙樓觀鬱連空一日都歸草棘中  
奢則兆亡天聽邇去而不返水聲東  
鎖烟弱柳愁蛾綠閣雨幽花淚臉紅  
總為錦帆歸不得至今啼鳥怨東風

旬休飲

媚媚東風雪外還又催春色動谿山百年莫作千年計  
十日須謀一日閒千丈歸心詩卷裏一襟豪氣酒杯間  
醉鞭約住黃昏月馬首低懸玉半環

息軒

乾沒皇皇西復東不知假息禍機中黃金一旦隨胠篋  
腐骨千年付撻蓬世味甜於刀上蜜人心苦是蓼中蟲  
一菴松雪雙明底笑殺西山槁項翁

九月七日飲

紫霞零落帶孤禽  
平楚蒼蒼秋意深  
月過初三半梳玉  
菊迎重九滿籬金  
天憐病骨商量暖  
雲促歸程計會陰  
風鴈飛來更瀟灑  
一枝蘆雪印波心

牧牛圖

三摩不受一塵侵  
本分工夫日念深  
杖履得廻遊子脚  
葛藤灰盡老婆心  
顛狂不作風頭絮  
出入誰傷井底金  
迴首人牛在何許  
一江明月夜沈沈

狸奴畫軸

三生白老與烏員又現吳生小筆前  
乞與王家襍鼠禍  
莫教虛費買魚錢

雜詩三首

道人知我愛禪房  
淨埽階前紫石牀  
軟飽三杯風味好  
脫巾和月臥昏黃

老子平生酷愛閒  
天教行處得禪關  
粥魚敲落簷頭月  
猶在梅花醉夢間

殘陽收拾弟兄行  
檢得機心不到鄉  
安置小奴今夜夢  
蘆花風細月如霜

絕句

流轉年光橋下水  
翻騰時態嶺頭雲  
溪翁道號奇聾子  
除却松風百不聞

高治中廷玉

四首

廷玉字獻臣恩州人大定末進士章宗衛王朝  
甚有時名為人豪爽尚氣節一時名士多歸之

貞祐初自左右司郎官出為河南府治中與知  
府復興屢以公事相可否時都城受圍使驛阻  
絕復興為安撫副使懼獻臣謀已乃以造逆訊  
之獻臣就逮龐才卿雷希顏王士衡辛敬之皆  
被羅織幾有一網之禍比赦至獻臣瘐死矣獻  
臣多作詩賦海中牛頭云鑿開混沌竅闢出神  
農首人多稱道之猶子廣之今在河平

補歸潛志高左司庭玉字獻臣遼東人少擢第

入官有能聲吏事明敏人莫能及尤倣儻重氣  
節為左司郎中名譽甚重一時人士推仰焉貞  
祐初出為河南府治中主帥溫特赫福興奸偽人也  
臨事少不遜讓遂交惡是時北兵圍燕都事已  
迫四方無勤王師公獨慨然有赴援意屢以言  
激福興福興憚之因誣以有異志輒收赴獄名  
士如龐才卿雷希顏辛敬之皆連繫考掠無實  
然公竟為福興所困死獄中餘會赦得釋公既

卒朝命下除公河南路安撫副使代福興士夫  
痛憤後朝廷知其冤謫福興遠郡昭雪之屏山  
於人材少許可至論公獨以為真濟世材又言  
其學術端正可以為吾道砥柱時之不幸為奸  
人所害屏山以詩哭之甚哀雷希顏又為文以  
祭述其事為時所稱屏山又將文其碑未著死  
後其子屬之雷公雷以其讐人猶在也亦未著  
迄今事狀不詳惜哉公詩亦高余家有數十篇



遭亂失去嘗記其中秋詩有云跳上玉龍背抱  
得銀蟾光亦奇語也

天津橋同李之純待月

驂鸞追散仙乘槎抵銀潢跳上玉龍背抱得銀蟾光素  
娥愁不歸再拜捧瑤觴問以天上事玉色儼以莊爾能  
為我歌白雪我亦為爾搗玄霜不然借我廣寒殿與我長作無  
何鄉傍有謫仙人拍手笑我狂天風忽吹散八月兩茫茫

柳絮

斷送春歸去，紛飛不暫停。  
和風三徑雪，微雨一池萍。  
蝶惹依芳草，蜂沾過小庭。  
靜宜投隙地，狂欲攪青冥。  
得穿朱戶時，時撲翠屏黃。  
鶯枝上語，似與訴飄零。

道出平州寒食憶家

柳色方濃別玉京，程程又值石龜城。  
山重水複人千里，月苦風酸鴈一聲。  
上國春風桃葉渡，東陽寒食杏花觴。  
楚魂蜀魄偏相妬，兩地悠悠寄此情。

拘幽怨

漢家自有飛將軍軍中駭歎箭有神一朝乃與獄吏對  
惜無千金書牘背手把屬鏤口銜鬚號天者三我何辜  
伊吾壯志長已矣不得提攜玉龍死可憐休唱白浮鳩  
至今秦人悲杜郵

李治中適

六首

適字平甫樂城人明昌二年進士高才博學無  
所不通為人滑稽多智而不欲表表自見工畫  
山水得前輩不傳之妙龍虎亦入妙品然皆其

餘事也泰和中大興幕官時呼遜知府事賣權  
恃勢奴視同列平甫每以公事相可否不少假  
借又摘其陰事數十條欲發呼遜謀篡者也聲  
勢焰焰人莫敢仰視乃為一書生所抗積不平  
先以非罪誣染之幾至不測雖有以自解竟坐  
是仕宦不進以東平治中致仕閒居陽翟十餘  
年自號寄庵先生平生詩文甚多如云舊恨新  
愁粧鏡在昨非今是酒杯乾贈筆工云工不能

書何以筆士須知筆乃能書感事云半錢利路  
人乃虎一鉤名餌吾其魚魯山道中云老夫自  
喜林野僻路人頗笑衣裳寬散失之餘不復全  
見矣臨終戒家人吾明日歸爾輩慎勿遽哭果  
如期而逝家人哭不禁良久開目云戒汝勿哭  
令我心識散亂言畢目復瞑其明了又如此子  
治字仁卿正大七年進士第屏山贈詩所謂仁  
卿不是人間物太白精神義山骨者也

贈中山楊果正卿

士道彫喪愁天公陰霾慘慘塵濛濛三冬不雪春未雨  
野桃無恙城西紅春光為誰作駘蕩造物若我哀龍鍾  
數行墨浪合眼死一包閒氣終身窮中山公子文章雄  
雅隨童稚為彫蟲彌衡不遇孔文舉坡老懶事陳元龍  
唯之與阿將無同乾坤萬里雙飛蓬飄飄南北東西風

江村

陸地無根客江村有髮僧兩盂殘喘粥一寸苦吟燈

集句題廣寧勝覽亭

簷前無數好峰巒  
醉眼詩腸冰雪寒  
不識廬山真面目  
請君來此凭闌干

獅子峰

解脫眼光三界靜  
端公伎倆一時休  
雲開正使金毛現  
子細看來是石頭

送窮

昔年曾作送窮詩  
結柳齋糧擬退之  
送去還來還復語

君家猶有讀書兒

使高麗

去國五千里馬頭猶向東  
宦情蕉葉鹿世味蓼心蟲  
倦枕三更夢征衫八月風  
山川秋滿眼歸思寄孤鴻

陳司諫規 二首

規字正叔稷山人明昌五年進士博學能文詩  
亦有律度為人敦厚動有禮節南渡以後諫官  
稱許古陳規而正叔不以許直自名尤見重云



仕至右司諫卒官子良臣今在燕中

補歸潛志陳司諫規字正叔絳州人弱冠擢第  
南渡為監察御史上便宜十事直言當時得失  
忤旨出為徐州帥府經歷官正大初收用舊人  
召為右司諫數上書論事改刑部郎中以事罷  
再為補闕復拜司諫言事不少衰朝望甚重凡  
宮中舉事上曰恐陳規有言近臣竊議惟畏陳  
正叔挺然一時直士也後出為中京副留守未

赴卒於圍城士論惜之公為人剛毅質實有古  
人風篤學問至老不廢晚喜為詩與趙閒閒諸  
公唱酬其弔人詩有云驄馬餘威行尚避仙鳧  
善政去猶思人以為頗的初先人見其所上十  
事歎曰宰相材也惜乎朝廷不能用後同朝相  
見甚歡未幾先人下世余復從之游每論及時  
事輒憤惋蓋傷其言之不行也死之日家無一  
金知交為葬之

送雷御史希顏罷官南歸

五事前陳志拂劇此如砥柱閱頽波一麾共惜延年去  
三黜何傷抑季和連蹇仕途如我老激昂衰俗在君多  
扁舟南去知難戀萬頃烟波一釣蓑

過驪山

豐鎬無由問故基三章止見黍離詩而今多少華清石  
都與行人刻艷辭

馮內翰延登

一十七首

延登字子駿吉州人承安二年進士令寧邊日  
適閒閒公守此州與之考論文義相得甚歡故  
子駿詩文皆有律度正大末奉命北使見留使  
招鳳翔不從欲殺者久之割其鬚髯羈管豐州  
二年乃得還天興初元授禮部侍郎京城陷自  
投井中子駿資稟淳雅與人交殊款曲讀書長  
於易左氏傳好賢樂善有前輩風調嘗欲輯國  
朝百家詩而不及也有集號橫溪翁予過大名

見於其子源如賦德順道院隴泉云玉壘制方  
維瓊漿闕仙宅何人劖雲根一旦泄地脉金匱  
鎖龍簾月窟逗蟾液銅壺漏水清玉斗天醴碧  
光搖日千道影落天一席窈然仇池穴自與天  
壤隔又登封途中遇雨留僧舍云濕雲若烟低  
飛雨如矢集近山衣已涼薄寒復相襲霽景雨  
草木秋意滿原隰林紅寒更殷山翠晴更濕不  
知高幾許但見蒼壁立羣峰誰暇數庭笋紛戢

戢騰擲來眼中左右疲顧揖皆其得意句也

補歸潛志馮吏部延登字子駿吉州人少擢第  
南渡為太常博士累遷吏部郎中翰林待制奉  
使北朝踰年歸遷吏部侍郎遭亂不知所終公  
為人謹愿吏事亦精篤學問長年猶不輟在公  
署日鈔書為文苦思尚奇澀詩亦新巧可稱與  
余先子交最善先子入翰林公與趙閒閒所薦  
也平生著述甚多嘗以示余亂後失散可惜

鄆城道中

北風慘澹揚沙塵鄆西三日無行人十村九村雞犬靜  
高田下田狐兔馴昨朝屏息過溪口知有白額藏深榛  
赤子弄兵更可惻路旁僵屍衣血新野叟偃僂行拾薪  
欲語辟易如驚膚瘦梅疎竹未慰眼只有清淚沾衣巾  
元日隆安道中

山岡重複三竿日溪路縈迴一席天老境飄零情更惡  
又從馬上得新年

宿三家寺

老柏蒼蒼纏老藤招提牢落有殘僧  
暝禽自入藏經閣  
饑鼠時窺照佛燈  
未得安心如北秀  
却思覓法趁南能  
濛濛雨暗門前路  
更得雲房一曲肱

代郡楊黻之與余同辰月日時亦然渠有詩因為  
次韻

陰陽疊疊定何如  
自信祥金先有模  
曾見唐生談躍馬  
豈知阮籍哭窮途  
倦游笑我衰髯白  
弄筆憐君醉袖烏



便欲移書與歐九畧分餘論為噓枯

寄笏青柯坪

飛雪驚沙捲屋茅清寒潑水透絺袍松風度壑江聲遠  
蘿月當軒扇影高敢對名山談世事不妨空腹貯離騷  
且將手版牢藏起政恐山人識馬曹

射虎得山字

田翁太息論三害獵騎俄驚見一斑涎口風生雷吼怒  
角弓寒勁月痕彎柳營共許千人敵魚服仍餘一矢還

我欲殘年賞神駿短衣匹馬夢南山

雪

破屋寒無那庭空雪已深山川非舊觀松柏見貞心凍  
雀爭遺粒棲鴉點暮林攜琴訪溪友清興憶山陰

華清故宮

寵貴羊羔退曲江華清霧閣對雲窓層巒未了霓裳舞  
遷客俄驚羯鼓腔簷際疎星疑曉鏡天邊晴樹認高幢  
遊人尚喜風流在白石涵波皂莢雙

西園得西字

芳逕層巒百鳥啼芝廬蘭畹自成蹊仙舟倒影涵魚藻  
畫棟銷香落燕泥淑景晴熏紅樹暖蕙風輕汎碧叢低  
岡頭醉夢俄驚覺歌吹誰家在竹西

八月十四日宿官塔下院二首

野僧引客看修竹拄杖入林驚暝禽一道細泉鳴薜磴  
恍如閒聽穎師琴

喬松修竹翠交陰涼月玲瓏地布金老嬾無詩酬節物

夜涼閒聽候蟲吟

探春得波字

好雨新晴景氣和東陂冰盡水增波  
茅茨影裏燕雙語桃李梢頭春幾何  
霽靄未收芳陌潤斜陽偏傍小樓多  
雕鞍畫轂方爭道更得留連藉綠莎

春雨二首

山市人歸暮雨飛倚筇久立看簷霏  
乍來勢若懸麻密暫止聲如鼓瑟希  
砌下蟻歸低赤幘簾間燕入濕烏衣

今宵客夢知安穩  
厭浥新涼到枕幃

小雨濛濛潤土膏  
谷風習習不驚條  
晨烟半濕低平野  
春水初生沒斷橋  
已見鶯黃勻柳麥  
更看檀紫上榆椒  
從今樂事知相繼  
櫛比雲平看隴苗

藤花得春字

白白紅紅委暗塵  
蒼藤次第看花新  
龍蛇奮起三冬蟄  
纓絡紛垂百尺身  
見說紫雲偏得意  
不知翠幄巧藏春  
齋厨晚甌清香滿  
未信侯門有八珍

蘭子野晚節軒

華顛益信寸心丹，直道寧論末路難。  
不歎士元淹驥足，但憂仲叔累猪肝。  
籬根佳菊分秋色，簷外長松耐歲寒。  
几有琴書樽有酒，却愁兒輩覺清歡。

洮石硯

鸚鵡洲前抱石歸，琢來猶自帶清輝。  
芸窗盡日無人到，坐看玄雲吐翠微。

附元好問跋松庵馮丈書士大夫負天下重名

然其詩筆字畫大有不能稱副者閒閒公有言  
以人品取字畫其失自歐公始如吾松庵丈詩  
筆字畫皆不減古人以人品取之歐公之言亦  
不為過必有能辨之者

御訂金匱詩增補中州集卷二十八



欽定四庫全書

御訂全金詩增補中州集卷二十九

劉鄧州祖謙

三首

祖謙字光甫安邑人承安五年進士歷州縣有  
政迹拜監察御史以鯁直稱其不能俯仰世好  
蓋天性然也正大初為右司都事除武勝軍節  
度副使召為翰林修撰家多藏書金石遺文畧  
備父東軒工畫山水故光甫以鑒裁自名至於

信筆作簡牘尤有可觀一時名士如雷御史淵  
李內翰獻能王右司渥皆遊其門得人一詩可  
傳必殷勤稱道唯恐不聞人以此稱之子敏仲  
今在平陽

補歸潛志劉翰林祖謙字光甫解州人少擢第  
為吏有聲由寧陵令丁父憂數年不調南渡召  
為大理司直拜監察御史出為河南府判官再  
召為翰林修撰遭亂北遷為兵士所殺公博學

通佛老百家書從趙閒閒李屏山諸公遊甚為  
所重談論疊疊不窮援筆為文奇士也嘗請屏  
山誌其父墓屏山以事廢命余代為銘辭屏山  
筆也迨屏山歿公以文祭有曰鳳不足以言瑞  
龜不足以效靈吾視之其猶龍也諸公稱之與  
余父子交嘗屬余作葡萄酒賦題其父所畫河  
山形勢詩亦一知已也

雅集圖

翠雀翩翩野鶴孤玉京人物會仙圖後來且莫輕題品  
席上揮毫有大蘇

崧峒山圖為橫溪翁二首

好奇仍有客相攜絕頂披雲快一躋三十六峰青似染  
五年拄笏羨橫溪

獨占名山每羨渠京塵今日汗吟鬚西州十載經行處  
惆悵雲烟是畫圖

高博州憲

八首

憲字仲常遼東人祖衍字穆仲國初進士仕至  
吏部尚書伯父守義大定十六年進士父守信  
以蔭補官叔守禮宣徽使仲常黃華之甥幼學  
於外家故詩筆字畫俱有舅氏之風天資穎悟  
博學強記在太學中諸人莫敢與抗泰和三年  
乙科登第自言於世味澹無所好惟生死文字  
間而已使世有東坡雖相去萬里亦當往拜之  
屏山故人外傳說仲常年未三十作詩已數千

首矣釋褐博州防禦判官遼陽破沒於兵間

元夕無燈

九陌無燈夜悄然  
小紅時見點春烟  
多情惟有梅梢月  
拍酒樓頭照管絃

寄李天英

稻稭蒼蒼陂已枯  
西風剪剪弄樛梧  
蒹葭水落魚梁迴  
蟋蟀聲高山驛孤  
社甕新成元亮酒  
并刀細落季膺鱸  
作詩遠寄霜前鴈  
人在海東天一隅

題新山寺壁

列壑攢峰發興新  
落花飛絮舞餘春  
虛堂坐視三千界  
冠者相從五六人  
澗草軟宜承屐齒  
溪泉清可濯纓塵  
靜聽山鳥松風裏  
始悟人間樂未真

焚香六言四首

茉莉花心曉露薔薇萼底溫  
風洗念六根塵外忘情一炷烟中

滿地落花春曉一簾微雨輕陰正  
要金蕉引睡不妨玉

軫知音

紙帳收烟密下松灰卷火常  
虛午寂春閒小睡人間自  
有華胥

沈水濃熏甲煎宮梅細點  
波津奕奕非烟非霧依依  
如幻如真

長城

秦人一鍛連雞翼六國蕭條  
九州一祖龍跋扈侈心開  
牛豕生民付碁磔詩書簡冊  
一炬空欲與三五爭相雄



阿房未了蜀山上石梁擬駕滄溟東生人膏血俱枯竭  
更築長城限裘褐臥龍隱隱半天下首出天山尾遼碣  
豈知亡秦非邊隅宮中指鹿皆庸奴驪原宿草猶未變  
咸陽三月為丘墟黃沙白草彌秋塞惟有坡陀故基在  
短衣匹馬獨歸時千古興亡成一慨

附堯山堂外紀遼陽張仲澤汝霖春溪詩云點  
點春愁底處消小桃無語半含嬌東風不管前  
溪水暖綠溶溶拍畫橋高仲常憲元夕無燈詩

云九陌無燈夜悄然小紅時見點春烟多情唯有梅梢月拍酒樓頭照管絃仲常黃華之甥黃華又仲澤之甥其淵源有自云

王監使特起

七首

特起字正之代州崞縣人智識精深好學善論議音樂技藝無所不能長於辭賦出入經史摘其英華以為句讀如天造神出至得意不減郭黼在張代州門下與屏山為忘年友泰和三年

進士甲科調真定府錄事參軍有惠政民立碑  
頌其遺愛改令沁源又遷司竹監使朝議欲以  
館職召試會卒遊龍德宮聯句云棘猴未窮巧  
槐蟻或失王賦雙峰競秀云龍頭蠱雙角駝背  
堆寒峰華山云三峰盤地軸一水落天紳造化  
無遺巧丹青總失真閒閒公屢哦此詩以為妙  
補歸潛志王特起正之代州崞縣人少工詞賦  
有聲年四十餘方擢第作詩極高嘗有龍德聯

句為時所稱晚年娶一側室留別一樂章喜遷  
鶯至今人傳之餘詩惜不多見嘗為沁源令政  
頗嚴後為司竹監官疾卒

沁源山中

野夫不識武城宰問之無言色微改但說今年秋雨多  
黃芪滿谷無人采踏遍西城錦石盤暮投佛屋解征鞍  
隔林依約見燈火山谷人家初夜寒

挽張代州詞

大節

砥柱堂堂閱潰川  
諫書一紙力回天  
兩朝眷倚傳龜玉  
五郡歡謠被管絃  
芟舍棠陰餘舊綠  
夜臺松月耿孤圓  
行人漫灑碑前淚  
誰識顏公是地仙

漫作

有時幽鳥話心事  
無限秋蟲誇口才  
北闕上書吾老矣  
東籬把菊思悠哉  
竹林留得巨源在  
蓮社招入淵明來  
不然餘子敗人意  
懷抱耿耿胡為開

偶作

人情爭勝似爭碁死怕輸人一著遲黑白不分傍袖手  
年來吾亦愛吾癡

絕句二首

山勢奔騰如逸馬水流委曲似驚蛇溪靈不欲露天巧  
眼力未到雲先遮

鳥語留春春已迴落花隨意臥蒼苔清明寒食因循過  
萱草薔薇次第開

下第

人間萬事等擣菹敢謂何人不得盧勝負到頭俱偶爾  
狂夫安用繞牀呼

李經

五首

經字天英大定人作詩極刻苦如欲絕去翰墨  
蹊逕間者李趙諸人頗稱道之嘗有詩云鴈奴  
失寒更拍拍叫秋水天長夢已盡秋思紛難理  
最為得意其餘或有不可曉者累舉不第卒

補歸潛志李經天英錦州人少有異才入太學

肄業屏山見其詩曰真今世太白也盛稱諸公  
間由是名大震字畫亦絕人再舉不第拂衣歸  
南渡後其鄉帥有表至朝廷士大夫識之曰此  
天英筆也朝議以武功就命倅其州後不知所  
終天英為詩刻苦喜出奇語不蹈襲前人妙處  
人莫能及號無塵道人題太真圖云君前欲拜  
還未拜花枝無力東風羞又夜雨云燈火萬家  
夜蕭蕭簾下聲晚望云夕陽萬里眼人立秋黃



昏夜起云夜起不得月河漢空星辰又步雲謠  
云一片崑崙心夕陽小烟樹又四言云老峰蹠  
雲壁立挽秀林陰灑雨蒼蒼玉闌虛明滿鏡夜  
氣成畫此其詩體也

雜詩五首

長河老秋凍馬怯冰未牢河山吟鞭底日暮風更號  
晨井凍不甕誰療壯士饑天廐玉山禾不救我馬墮  
塵埃汨沒伺候工離騷不振矜魚蟲風雲誰復話蒼蔡

縱有絕技哀屠龍挾牋搦管坐書空咿嚶堂上酣歌鐘  
乃知造物戲兒童不妨遠目送歸鴻莫怪魏匏無所容  
此去未許江船東五經不掃途轍窮門庭日月生皇風  
太阿繡澀礪以石坐看雙匣鳴雌雄

巖椒鬱雲日夕生陰雨雪縞夜秋黃老林人烟墨突樵  
徑雲深

造物開巖地巖帳揜劍壁苔花張古錦霜苦老秋碧日  
夕雲竇陰風鼓泉湧石馬蹄忌磽确樵道生枳棘盤盤

出井底迴首悵如失長老不耐事底事挂塵迹披雲出  
山椒白鳥表林隙

附書史會要李經少有異才字畫亦絕人

附趙秉文答李天英書天英足下自足下失意  
東歸無日不思恍如三歲向得來音甚悉動靜  
為慰所望所寄雜詩疾讀數過擊節屢歎足下  
天才英逸不假繩削豈復老夫所可擬議然似  
受之天而不受之人屢欲貢悃誠山川間之坐

成浮沉况勤厚如此過望黠化僕非其人筆拙  
思荒自濡其涸况望餘波耶豈以大馬齒在前  
欲俯就先後進禮耶聊布一二所聞於師傅間  
者幸恕不揆嘗謂古人之詩各得其一偏又多  
其性似者若陶淵明謝靈運韋蘇州王維柳子  
厚白樂天得其冲淡江淹鮑明遠李白李賀得  
其峭峻孟東野賈閬仙又得其幽憂不平之氣  
若老杜可謂兼之矣然杜陵知詩之為詩未知

不詩之為詩而韓愈又以古文之渾浩溢而為  
詩然後古今之變盡矣太白詞勝於理樂天理  
勝於詞東坡又以太白之豪樂天之理合而為  
一是以高視古人然亦不能廢古人足下以唐  
宋詩人得處雖能免俗殊乏風雅過矣所謂近  
風雅豈規規然如晉宋詞人蹈襲用一律耶若  
曰子厚近古退之變古此屏山守株之論非僕  
所敢知也詩至於李杜以為未足是畫至於無

形聽至於無聲其為怪且迂也甚矣其於書也  
亦然足下立言措意不蹈襲前人一語此最詩  
人妙處然亦從古人中入譬如彈琴不師譜稱  
物不師衡上匠不師繩墨獨自師心雖終身無  
成可也故為文當師六經左丘明莊周太史公  
賈誼劉向揚雄韓愈為詩當師三百篇離騷文  
選古詩十九首下及李杜學書當師三代金石  
鍾王歐虞顏柳盡得諸人所長然後卓然自成

一家非有意於專師古人也亦非有意於專擯  
古人也自書契以來未有離古人而獨立者若  
揚子雲不師古人然亦有擬相如四賦韓退之  
惟陳言之務去若進學解則客難之變也南山  
詩則子厚之餘也豈遽汗漫自師胸臆至不成  
語然後為快哉然此詩人造語之工古人謂之  
一藝可也至於詩文之意當以明王道輔教化  
為主六經吾師也可以一藝名之哉賈誼董仲

舒司馬遷揚子雲韓愈歐陽修司馬溫公大儒  
之文也僕未之能學焉梁肅裴休晁迥張无盡  
名理之文也吾師之太白杜陵東坡詞人之文  
也吾師其辭不師其意淵明樂天高士之詩也  
吾師其意不師其詞然吾老矣眼昏力綿雖欲  
學古人力不足也足下來書自言近日欲作大  
字然滯於藏鋒不能飛動詩欲古體然僻於幽  
隱不能豪放足下自知之僕尚何言然藏鋒書



之一端所貴偏學古人昔人謂之法書豈是率  
意而為之也又須真積力久自楷法中來前人  
所謂未有未能立而能走者飛動乃吾輩胸中  
之妙非可學也若市人能積學而不能飛動吾  
輩能飛動而不能積學皆一偏之弊耳東坡論  
五十八草書似鶯哥嬌數日相見曰此書何如  
曰乃秦吉了耳足下之書無乃近似之乎精神  
所注間出奇逸稍怠之際如病癰腫得免秦吉

了矣想當捧腹大笑也寄來詩如雜詩五首  
老昏殊不可曉然此迄於大成不過長吉盧仝  
合而為一未能以故為新以俗為雅非所望於  
吾友也昔人有吹簫學鳳鳴者鳳鳴不可得聞  
時有梟音耳君詩毋乃間有梟音乎向者屏山  
嘗語足下云自李賀死二百年無此作矣理誠  
有之僕亦云然李公愛才然愛足下之深者宜  
莫如老夫願足下以古人之心為心不願足下

受之天而不受之人如世輕薄子也與足下心  
知故道此意幸少安無躁

梁太常持勝一首

持勝字經甫絳州人本名洵義避宣宗諱改父  
襄字公贊大定初進士質直尚義有古人之風  
仕至保大軍節度使有諫興陵田獵表傳於世  
其賀章宗即位表云曾天子祖天子世嫡相  
承舜何人子何人自強不息又自河南府倖移

華州防禦使謝上表云昔司雒邑已陪嵩嶽之  
呼今領華防願效封人之祝世亦稱之經甫泰  
和六年進士制策優等宏辭亦中選為人儀觀  
雄偉以文武志膽見稱貞祐初由太學博士為  
咸平治中宗室承裕辟為僚佐承裕死太平謀  
不軌以兵脅經甫使作文移經甫大罵不從即  
日遇害時年三十六贈韓州刺史初赴官有詩  
云山雲欲雨花先慘客路無人鳥亦悲人以為

識云

海棠

野杏山桃委路塵芳華都屬錦城春只緣造物偏留意  
任使無香亦可人粉白漫誇粧樣巧胭脂難染睡痕新  
沈香亭子勾欄畔消得君王比太真

愚軒居士趙元

三十三首

補一首

元字宜之定襄人經童出身舉進士不中以年  
及調鞏西簿未幾失明自少日博通書傳作詩

有規矩泰和以後有詩名河東李屏山為賦愚  
軒有落筆突兀無黃初之句愚軒宜之自號也  
用是名益重南渡以後往來洛西山中閒閒公  
雷御史王子文許至忠崔懷祖皆愛之所至必  
虛左以待為人有材幹處事詳雅既病廢無所  
營為萬慮一歸於詩故詩益工若其五言平淡  
處他人未易造也宜之之父名淑字清臣由門  
資叙與先隴城為莫逆交故好問交游間得宜

之之詩為多子顯有隱節今居鄉里

補歸潛志趙宜祿宜之忻州人幼舉童子第及  
壯病目失明自號愚軒居士高才能詩其所讀  
書皆自少時不忘居西山下以吟咏為樂名士  
無不與游趙李諸公甚重之屏山常賦愚軒云  
我雖有眼不如無安得恰似愚軒愚後病歿有  
愚軒集送辛敬之云李白久矣騎長鯨後五百  
歲之純生

鄰婦哭

鄰婦哭哭聲苦一家十口今存五我親問之亡者誰兒  
郎被殺夫遭虜鄰婦哭哭聲哀兒郎未埋夫未迴燒殘  
破屋不暇葺田疇失鋤多草萊鄰婦哭哭不停應當門  
戶無餘丁追胥夜至星火急并州運米雲中行

渡洛口

一脉寒流兩岸冰斷橋無力強支撐忘機羨殺沙鷗鳥  
不省人間有戰爭



書懷繼元弟裕之韻三首

著龜不須問我命只自知多生墮宿業世網纏綿之驂  
騮受羈銜大笑跛鼈遲跛鼈亦復笑縮首甘自卑何必  
參漆園物理本自齊檳榔可消穀志士常苦饑穆之萬  
人雄猶不免此譏我懦更多病區區欲何為鐘鼎不可  
倖藜藿分所宜安能如黃蜂為人填蜜脾清白儻少汗  
平聲後人何所貽初學悔大謬篆刻工文辭年來厭酸鹹  
淡愛陶潛詩愛詩固自佳其如未忘機回頭四十年言

動俱成非誰能逐世利日久常規規惟當種溪田與子  
常相期窓扉有生意山間春到時長安冠蓋塵游哉不  
如茲西疇將有事老農真吾師不見元魯山夢寐役所  
思遺山乃其後僻處正坐詩時復一相過照眼珊瑚枝  
奇書多攜來為子臥聽之

少從白衫游氣與山崢嶸一念隨文字腸腹期拄撐多  
機天所災室暗燈不熒拈書枕頭睡鼻息春雷鳴泰山  
與鴻毛何者為重輕跡泓與渤澥誰能較虧盈如能平

其心一切當自平

嵩箕有奇姿出雲何悠然  
雲山足佳處留客今幾年  
有子罷讀書求種山間田  
栗里愧淵明香山慙樂天  
二老已古人相望雲泥懸  
得酒邀月來對影空自憐  
攝衣欲起舞稚子不須牽

喜霽

片段溪雲破縱橫野水涼  
人閒泥塞路蠅動日烘窓  
映壁苔痕滿侵堦樹影雙  
還思釀新黍甕面挹秋江

詩送辛敬之東歸二首

風埃憔悴舊霜袍老去新詩價轉高  
橡栗漫山猶可煮不須低首向兒曹

文章無力命有在一點浩然天地間  
風雪滿頭人不識又攜詩稿出西山

修城去

甲戌歲忻城陷官復完治  
途中聞哀歎聲感而有作

修城去勞復勞途中哀歎聲嗷嗷  
幾年備外敵築城恐不高城高慮未固  
城外重三壕一鋏復一杵  
漚盡民脂

膏脂膏盡猶不辭本期有難牢護之一朝敵至任推擊  
外無強援中不支傾城十萬戶屠滅無移時敵兵出境  
已踰月風吹未乾城下血百死之餘能幾人鞭背馳行  
補城缺修城去相對泣一身赴役家無食城根運土到  
城頭補城殘缺終何益君不見得一李勣賢長城莫道  
世間無李勣

田間秋日三首

好雨知時便放晴天和醞釀作西成秋收但得官軍飽

未怕輸租遠十程

禾穗纍纍豆角稠  
松前村落太平秋  
熙熙多少豐年意  
都在農家社甕頭

皤翁偃僂負薪行  
稚子跳梁剝棗聲  
不似二姑忙更苦  
晚春椎髻脫釵荆

客况

廬山踏遍却歸松  
世事悠悠付老慵  
樂近僧居非佞佛  
苦無田種強為農  
菊花雨似人情冷  
梨葉霜如酒力濃

一十五秋河表客  
合教節物笑龍鍾

學稼

不堪炊煮一箱書  
十口東西若可餬  
食祿已慙中隱吏  
墾山聊作下農夫  
藁遺場圃無多積  
籽入官倉困遠輸  
近日愚軒睡眠少  
打門時復有追胥

立秋日

况味年來老比丘  
禪房三伏得遲留  
連宵雨作垂垂曉  
十口家貧盼盼秋  
熟未先須伺禾黍  
有無何暇問衣裘

半生枉却親燈火一事不成空白頭

村居夏日

官府不著名散迹村落深白雲自朝暮青山無古今愛  
此夏日永門巷多繁陰呼兒具繩牀不履亦不簪殷勤  
好風來為我消煩襟一飽萬事了何用腰黃金羈勒困  
名馬網羅多珍禽何如山鹿癡呦呦戀長林

次韻答裕之

薄暮敲門喜客佳水萍風絮共天涯行藏一話傾心肺



古律三詩淬齒牙朱研不妨閒度日青山終得共餐霞  
扶持老病須君輩滿地豺狼萬里家

書懷

嬾退無心廩與庖願攜諸子劖山磽閒消白日醒吟醉  
猛省浮生夢幻泡窈窕雲山三兔窟漂搖風樹一鳩巢  
聯名便入村家社莫認公卿是故交

寄裕之二首

汨沒兵塵滿鬢霜買鄰心樂古清涼閒陪老秀春行脚

悶欠臞元夜對牀正欲脫身求兔窟誰能隨世轉羊腸  
南陽未必嵩陽好滿眼交游即故鄉

老嬾愚軒百不能飽諳人意冷於冰清狂舊日耽詩客  
灰朽而今有髮僧服裏紙衾三丈日話延雪屋一龕燈  
新開小徑通蘭若斬盡清涼舊葛藤

丙子夏臥病汗後有作

枯腸得水若通靈渙汗週身一雨零行客筋骸困方歇  
醉人心骨喚初醒病蟬移夢入新穀老鶴息神梳舊翎

乞得殘骸對兒女不愁無粟貯陶瓶

宿少林寺

雙輪走雞棲下嶺分間道行行得精舍翠崦作迴抱諸  
峰知客來故故顏色好征衫滿塵土慙愧方丈老殷勤  
一瓣香為我除熱惱世緣如落花離裊跡俱埽箇中有  
佳處行脚恨不早一庵祖師傍異日親結草

晚出

坐久臥還起畏此夏日長出門髮蓬鬆西日明半墻鳩

鳴含東柳雌和塙南桑十日暑煩苦一雨方論量偶然  
釋憂抱露坐移繩牀羣兒莫相催老子便晚涼

次韻裕之見寄二首

魚入深淵鶴在陰飛潛何幸遠庖砧乾坤萬里雲無迹  
冰雪三冬栢有心故國勾留清夜夢歲華分付白頭吟  
莘川擬作桃源隱共與青山閱古今

古屋颼颼四壁塵不堪幽獨足吟呻瓶儲看客常年慣  
家具為農近日新世味飽嘗惟可睡詩情漫苦不醫貧

相從分我西山半欲乞臞元伴老身

題裕之家山圖

繫舟盤盤連石嶺收馬澄澄倒山影山光水氣相混涵  
中有元家舊廬井鴈門一開豺虎場駕言投迹嵩之陽  
青山偃蹇不可將十年竟陷兵塵黃東巖風物知猶在  
說與寄庵神已會一揮淡墨能似之清輝遠寄形骸外  
元家故山吾與鄰夢見不如畫圖真舊曾行脚聊經眼  
未得歸時亦可人

早發寶應龍門道中有感

山僧送客客行東  
迴首雲寮夢寐中  
人語咿啾村店火  
帽簷欹側石門風  
伊川遠暝春冰綠  
少頂先攬曉日紅  
為問年來幾還往  
只應烏鵲識衰翁

欽若遽有商於之行作長語為別兼簡仲澤弟一笑

廬山窈然深可居  
洛水澄然清可漁  
嘉哉山水有如此  
不能留客如蘧廬  
楚茅不入干王誅  
大帥分閭臨商於

謀參帷幄渴英俊蒐羅遠到山間癯隴西四欽出將種  
人愛若也溫而愉竭來誰飛薦鶚書枕前墮檄催馳驅  
行參幕賓亦大可把酒當為帥君賀王家仲澤如仲宣  
共看吐奇飛玉唾一軍號令雅歌中聲落荆蠻膽先破  
愚軒退居如甌墮閒暇多君時見過明朝笑語隔關山  
一月須拚面牆臥

丁亥三月二十五日雪

大變乾將至陰凝陽不流雨飛猶帶雪風急似號秋草

木無春意關河慘客愁天心寧易測三歎索冬裘

大暑

旱雲飛火燎長空白日渾如墮甑中不到廣寒冰雪窟  
扇頭能有幾多風

讀樂天無可奈何歌

鬼脛苦太短蛭足何其多物理斬不齊利劍空自磨老  
跼富且壽元惡天不訶伯夷豈不仁餓死西山阿天意  
寓冥邈人心徒揣摩不如且飲酒流年付蹉跎酒酣登



高原浩歌無奈何

袁古道

山深道壞水縱橫  
怪得春來少客行  
不信天教人迹斷  
水乾更遣蒺藜生

薛鼎臣罷登封


弄人鼓笛不相疑  
便著登場傀儡衣  
終日抱飢唯飲水

也和醉客一時歸

鼎臣才大夫宰登封有惠政今以例罷故有上句

題嵩陽歸隱圖

風烟萬頃一掾茅丘壑端能做市朝窈窕雲山三兔穴  
飄飄風樹一鳩巢本來無取亦無與只合自漁還自樵  
三十六峰俱可隱願從君後不須招



御訂金詩增補中州集卷二十九